

ԱՐԹՈՒՐ ՄԽԻԹԱՐՅԱՆ

ԱՂԵՏԻ ՀԵՏԵՎԱՆՔՆԵՐԻ ՎԵՐԱՑՄԱՆ ԳՈՐԾԸՆԹԱՑԸ
ԳՅՈՒՄՐԻՈՒՄ 1989-1998թթ

1988թ. դեկտեմբերի 7-ին ՀՀ տարածքում տեղի ունեցած ավերիչ երկրաշարժը պատճառեց հսկայական նյութական և բարոյական վնասներ: Ձգալիորեն տուժեց մեծությամբ և նշանակությամբ հանրապետության երկրորդ քաղաքը՝ Գյումրին, որտեղ ավերվեցին բնակելի, հասարակական և արտադրական շենքերի 80 տոկոսը: Զորս տասնյակ վայրկյանում Լենինականում ավերվեց կամ կիսավիուլ դարձավ 774 շինություն:¹ Երկրաշարժի հետևանքով զոհված շուրջ 25000 Հայաստանի քաղաքացիների ամենամեծ քանակը բաժին է ընկնում Գյումրիին, որը տարբեր աղբյուրների վրա հիմնված հաշվումների համաձայն տատանվում է 15-17000-ի սահմաններում:² Շարքից դուրս եկավ շինարարական ինդուստրիայի զգալի մասը: Աղետից վթարվեցին կամ քանդվեցին նաև կոմունալ տնտեսության, տրանսպորտի, հանրային, կապի, առևտրի, սննդի և այլ նշանակության մեծաքանակ օբյեկտներ, ինչպես նաև պատմական հուշարձաններ, հանրակրթական դպրոցներ, նախադպրոցական հիմնարկներ, առողջապահական հաստատություններ: Երկրաշարժի հետևանքով տարբեր աստիճանի վնասվածություն ստացած բնակարանային ֆոնդը կազմել է 8,9 միլիոն մետր² ընդհանուր մակերեսով բնակելի տներ, որից 3,6 միլիոն մետր³ Շիրակի մարզում:

Նմանատիպ մասշտաբի երկրաշարժի հետևանքների վերացման փորձը ցույց է տվել, որ միայն աղետն ապրած երկրի ուժերով ու միջոցներով այն իրականացնել փաստորեն հնարավոր չէ:

Շինարարական կազմակերպական աշխատանքները կորողնացնելու համար, Մոսկվայում ստեղծվեց երկրաշարժի հետևանքները վերացնելու համընթացողով ԽՍՀՄ նախարարների խորհրդի նախագահ Ն. Ի. Ռիժկովի ղեկավարությամբ:

¹ Ս. Մանուկյան, Երկրաշարժ, 1989, էջ 5:

² Ն. Սարգսյան, Ժողովրդագրական գործընթացները Շիրակի մարզում 1989-1998թթ., Եր., 2000, էջ 15:

³ Աղետի գոտու վերականգնման Առաջնահերթ ծրագիր, 1998, էջ 6:

Դեկտեմբերի 8-ին հանձնաժողովը ժամանեց Երևան և անմիջապես մեկնեց աղետի գոտի և սկսեց իր անմիջական աշխատանքները, աղետի հետևանքները հաղթահարելու ուղղությամբ:⁴

«Արևմուտքի ոչ մի երկիր նման պայմաններում չէր կարող ավելի լավ կազմակերպել առաջին օգնությունը ցույց տալու և ավերածությունները վերացնելու գործը,- Հայաստանից Հաագա վերադառնալով օդանավակայանում լրագրողներին ասաց Նիդեռլանդների կարմիր խաչի ներկայացուցիչ Բ.Ղը Գրաաֆը,- ինչպես նախնական փուլում դա արեց Խորհրդային Միությունը: Չնայած օտարերկրյա օգնության նշանակալից ծավալին, տուժածների համար բեռների հիմնական հոսքը, այդուհանդերձ, գալիս է խորհրդային հանրապետություններից»:⁵

Դեռևս դեկտեմբերի 10-ին ստեղծվեց քաղաքաշինության պետական միջգերատեսչային հանձնաժողով, որի նպատակն էր ուսումնասիրել երկրաշարժից տուժած շրջանների բնակավայրերի տարածքը, քաղաքների և գյուղերի գլխավոր հատակագծերը, կառուցապատման նոր շրջանների նախագծերը համաձայնեցնել բոլոր միութենական հանրապետությունների, Մոսքաղգործկոմի, Մոսմարգոթրծկոմի, Լենքաղգործկոմի, երկրի խոշորագույն 8 նախարարությունների կողմից կառուցվելիք շինարարության ծավալի հետ:⁶

Ավերված շրջանների վերականգնման աշխատանքները կոորդինացնելու նպատակով ԽՄԿԿ Կենտկոմի քաղբյուրոն 1989թ. դեկտեմբերի 28-ին ընդունեց հատուկ որոշում:⁷

Փաստորեն, 1989թ. դեկտեմբերի 28-ի որոշմամբ արձանագրվեց, որ փրկարարական աշխատանքներն արդեն հիմնականում ավարտված են և ժամանակն է անցնել երկրորդ փուլին՝ վերականգնողականին:

Վերականգնողական աշխատանքները իրականացվում էր ավերակույտերի մաքրմանը զուգընթաց: Դեկտեմբերի 10-ին Լենինականը հոսանք ստացավ: Երկու օր անց վերականգնվեց քաղաքի ջրամատակարարման չորս համակարգերից մեկը: Դեկտեմբերի 15-ին Հայտրանսչինի, Հարավչինմեքենայացման, Հարավայինի, Դոնեցկի շինարարների ջանքերով վերակառուցվեց երկաթուղու Լենինական-Սպիտակ-Կիրովական հատվածը և ճեպընթացը շարժվեց դեպի Թբիլիսի:⁸

⁴ Երկրաշարժ, ժամանակագրություն, հ.1, էջ 31, Եր., 1989:

⁵ «Սովետական Հայաստան» 30 դեկտեմբերի 1988:

⁶ Նույն տեղում:

⁷ Նույն տեղում: Армения декабрь, 88, Ереван, 1990 г. ст 477.

⁸ Սանուկյան Ա., Երկրաշարժ 1989թ. էջ 66:

1989թ. աղետի գոտում աշխատում էին Միության տարբեր շրջաններից եկած ավելի քան 40 հազար մասնագետներ, զինծառայողներ⁹:

Կործանարար երկրաշարժի արհավիրքների վերացման և տուժածներին օգնություն ցույց տալու գործին իրենց մասնակցությունը բերեցին արտասահմանյան զրեթե բոլոր երկրների կառավարությունները, կազմակերպությունները, աշխարհասփյուռ հայությունը, անհատ բարեգործները, հասարակական միությունները:

Աղետի գոտու ամենագործնական ու կարևոր հարցերից մեկը Լենինականի շինարարության ճիշտ ուղղության ընտրությունն էր:¹⁰ Սկզբնապես որոշված էր, որ Լենինականը մնալու էր իր տեղում, պահպանելով պատմական ամբողջականությունը և 1991թ. այն ունենալու էր 200 հազար բնակչություն: Նախատեսված էր կառուցել 2 միլիոն քառակուսի մետր տարածությամբ բնակարաններ, կուլտուր-կենցաղային օբյեկտներ, ուսումնական և նախադպրոցական հաստատություններ, ինչպես նաև արտադրական ու սպասարկման ձեռնարկություններ: Նախագծողներն ու շինարարները ձգտում էին կրկին կյանք հաղորդել Կոմայրի պատմական կենտրոնին, որպեսզի այն ունենար իր հնմանի շքեղությունը: Լենինականի նախագծման աշխատանքները իրականացնում էր «Երևաննախագիծ» ինստիտուտի կոլեկտիվը: Ընդհանրապես նախագծային աշխատանքներ էին կատարում շուրջ 100 կազմակերպությունների 14 հազար ճարտարապետներ, ինժեներներ և այլ մասնագետներ:

1989թ. հունվարի 16-ին Երևանի ճարտարապետի տանը Ն. Ի. Ռիժկովը և ԽՄԿԿ Կենտկոմի քաղբյուրոյի հանձնաժողովի անդամները ծանոթացան վերականգնվող քաղաքների և գյուղերի նախագծերին: Բուռն վիճաբանությունները շարունակվեցին մինչև ուշ գիշեր: Վեճը գնում էր հիմնականում Լենինականի շուրջ:

Նրանց մի մասը գտնում էր, որ քաղաքը պետք է փլատակներից վերականգնվի և շինարարությունը սկսվի ավերված թաղամասերից: Մյուսների կարծիքով, այդ թաղամասերը դեռ պետք է մնան, իսկ շինարարությունը պետք է սկսել նոր տեղում: Իսկ որտե՞ղ: Նախատեսված շրջանը գտնվում էր քաղաքից մի քանի կիլոմետր հարավ-արևելք, բլրաշատ տեղամասում՝ Արևիկ և Այգաբաց գյուղերի միջև: Ընդդիմախոսները առաջարկեցին քաղաքը կառուցել հյուսիսային և հյուսիս - արևմտյան ուղղությամբ, վարելահողերի վրա Մարմաշեն գյուղի մոտ:

⁹ Правда, 14 мая 1989г.

¹⁰ Գիտություն և տեխնիկա, N12, 1989թ. 3 (315) դեկտեմբեր:

Երկու տարբերակներն էլ ունեին դրական և բացասական կողմեր: Առաջին տարբերակի (քաղաքի կառուցումը բլրաշատ տեղանքում) դրականն այն էր, որ օգտագործվում էին ոչ թե վարելահողերը այլ գյուղատնտեսության համար անօգտագործելի տարածքները, սակայն պետք է կառուցվեին նոր ճանապարհներ, ստորգետնյա հաղորդակցության ուղիներ և այլն: Նոր քաղաքը բավականաչափ հեռու էր մնում Լենինականից:

Երկրորդ տարբերակը որոշ չափով ձեռնտու էր, բայց ափսոս էին վարելահողերը: Միտությանի շրջանից սկզբնական շրջանում վերցվելու էին 58 հեկտար վարելահող, որի համար էլ Աճի թաղամասը կոչվեց հիսունութ: Այս տարբերակի կողմնակիցները գտնում էին, որ ավելի լավ է քաղաքը կառուցել սեյսմակայուն տարածքում և այն կլինի ամուր և խաղաղ:

Ընտրությունը կատարվեց հօգուտ հյուսիս - արևմտյան տարբերակի կառուցել Լենինականի սահմանին կից, իսկ հետո անցնել ներքաղաքային, ավերված թաղամասերի վերականգնմանը:¹¹

1989թ. Լենինականում սկսվեց բնակֆոնդի աննախադեպ ինտենսիվ կառուցում, և շինարարությունը նոր թաղամասերում ընթանում էր այնպիսի թափով, որ նոր Գյումրիի գաղափարը կյանքի կոչելը կասկած անգամ չէր հարուցում: Բուն քաղաքում նախատեսվում էր վերականգնել 1 միլիոն 23 հազար² մետր բնակելի տարածք: Քաղաքն ավերված էր, չէին գործում կոմունիկացիաները, այնպես որ հին քաղաքում խոշորամասշտաբ բնակարանային և սոցիալական խնդիրների լուծումը գործնականում անհնարին էր:

Չնայած երկրաշարժի հետևանքները վերացնելու համար նախկին խորհրդային Միության իշխանությունների կողմից ընդունվեցին մի շարք որոշումներ, որոնցով նախատեսվում էր միութենական հանրապետությունների, նախարարությունների, գերատեսչությունների ուժերով 1989-1990 թվականներին հիմնականում վերականգնել աղետի գոտին, այն լիովին չիրագործվեց: Աղետի գոտում և մասնավորապես Գյումրի քաղաքում մեծ ծավալի աշխատանքներ կատարեցին նախկին ԽՍՀՄ բոլոր հանրապետությունների հարյուրավոր շինարարական կազմակերպություններ ներգրավելով շինարարական տեխնիկա, ավտոտրանսպորտ, շինանյութեր, աշխատուժ և այլն: Չնայած դրան, այդ կազմակերպությունները 1991թ. աշնանը, իսկ Ռուսաստանի դաշնության շինարարները 1993թ. ընթացքում հեռացան հանրապետությունից իրենց հետ տանելով շինարարական տեխնիկայի մեծ մասը: Փաստորեն 1991թ. աշնանից իրականացվող աշխատանքների ամբողջ ծանրությունն ընկավ

¹¹ Гай Д. Землетрясение в Армении, Москва, 1989, с.244.

հանրապետության շինարարական համալիրի ուսերին, որը գտնվում էր սոցիալ-տնտեսական ծանր կացության մեջ¹²:

Վերականգնողական աշխատանքներին մեծ վնաս հասցրեց 1989թ. սեպտեմբերից Ադրբեջանի կողմից իրականացված շրջափակումը,¹³ ինչպես նաև պատերազմը Լեռնային Ղարաբաղում, փախստականների օրհասական դրությունն ու հանրապետությունում տիրող սոցիալ – տնտեսական և էներգետիկ ճգնաժամը:

Հարց է ծագում, եթե ԽՍՀՄ –ը չփլուզվեր, կառավարության հավաստիացումները աղետի գոտին երկու տարում վերականգնելու մասին կունենա՞յին հիմք: Պատասխանը միանշանակ է ոչ, որովհետև առաջին տարում տեղադրվում էին շինարարական բազաները և աշխատանքներ էր տարվում քաղաքների ու գյուղական բնակավայրերի կառուցապատման նախագծերի մշակման և հաստատման ուղղությամբ: Շինարարությունը մեծ թափով սկսվեց և եթե այդ տեմպերը պահպանվեին, գոնե չորս տարվա ընթացքում հնարավոր կլիներ լուծել անօթևանության խնդիրը, սակայն փաստն այն է, որ այդ ամենի վրա հույս դնել չէր լինի ու այն ինչ արվեց ընդամենը 1/3-ն էր սկսածի, իսկ 2/3-ը մնաց անավարտ:

Ստեղծված իրավիճակից դուրս գալու, վերականգնողական աշխատանքներին նոր լիցք հաղորդելու համար ՀՀ կառավարությունը 23.04.1991թ. թիվ 196 կարգադրությամբ ՀՀ էկոնոմիկայի նախարարությանը հանձնարարեց մշակել աղետի գոտու վերականգնման ծրագիր, որը հավանություն ստանալով 1991թ. նոյեմբերի 15-ին ներկայացվեց ՀՀ Գերագույն Խորհրդի քննարկմանը: Սակայն, անցած ժամանակահատվածում փոփոխված սոցիալ-տնտեսական ելակետային բազան ստիպում էր այդ ծրագրի վերանայում, որի կապակցությամբ ՀՀ կառավարությունը 27.01.1993թ. թիվ 30 կարգադրությամբ ՀՀ էկոնոմիկայի նախարարությանը պարտավորեցրեց որպես պատվիրատու կազմակերպություն վերակազմել այն:¹⁴

1993թ. հոկտեմբերի 4-ի թիվ 500 որոշմամբ ՀՀ կառավարությունը որոշում է Համաշխարհային բանկի կողմից տրամադրված վարկի հաշվին աղետի գոտու վերականգնման ծրագրի պատրաստման և իրականացման մպատակով

¹² Շինարարական - վերականգնողական աշխատանքներն աղետի գոտում 1989-1998, Եր., 1990, էջ 3:

¹³ Շրջափակում, հ. 1, ժամանակագրություն, Եր., 1990, էջ 3

¹⁴ Հայաստանի Ազգային Արխիվ (այսուհետ ՀԱԱ), ֆ.1185 ց 1, գ.5,թ.4-5:

¹⁵ ՀԱԱ, ֆ. 1185, ց. 1, գ.5,թ.11:

ստեղծել ՀՀ էկոնոմիկայի նախարարությանն առնթեր Աղետի գոտու վերականգնման ծրագրի պատրաստման և իրականացման գրասենյակ՝ տալով նրան իրավաբանական անձի կարգավիճակ:¹⁵

Երկրաշարժի հետևանքների վերացման ֆինանսական միջոցների օգտագործման կապակցությամբ ՀՀ կառավարության կողմից 1988-1993թթ. ընդունվել են 111 կարգադրություն և 9 որոշում:¹⁶

ՀՀ կառավարությունը 1994թ. հունվարի 7-ի թիվ 17 որոշումով հաստատեց աղետի գոտու վերականգնման և շինարարական աշխատանքների հանրապետական նպատակային ծրագիր:¹⁷ Ճշտվեցին երկրաշարժի հետևանքով տուժած բնակավայրերի առանձին ոլորտների վերականգնման ենթակա ծավալները և իրականացման ժամկետները:

Ընդհանուր առմամբ 90-ականների կեսերը պարապուրդային տարիներ էին, իսկ 1994թ. նպատակային ծրագիրը փաստորեն մնաց միայն թղթի վրա: Շիրակի մարզը և մասնավորապես Գյումրի քաղաքը մատնվեց անտերության: Ճիշտ է փոքր ծավալով շինարարություն իրականացվեց Համաշխարհային բանկի միջոցների հաշվին, սակայն այդ աշխատանքները կատարվում էին կիսատ – պոատ, շենքերը շահագործման էին հանձնվում ոչ ամբողջական ավարտուն տեսքով, որն էլ իր հերթին առաջ էր բերում նոր հիմնախնդիրներ: Կատարվող աշխատանքները չէին համապատասխանում քաղաքների զարգացման և շուկայական տնտեսության չափանիշներին: Վերականգնման ծրագրերը մշակվել էին մեկ այլ ժամանակի և այլ համակարգի պայմաններում: Ընդունված մոտեցումները ժամանակին թվում էին իրագործելի: Հասկանալի է, որ նախկինում ընդունված բազմաթիվ նոր քաղաքների հատակագծերը չափազանց ծավալուն էին և նախագծման, և իրականացման արժեքի գնահատման տեսակետից: Ժամանակին հարմար էր խորհրդային Միության բոլոր հանրապետություններից ժամանած նախագծողներին ներկայացնել մեծածավալ բյուջե: Հսկայական ներդրումներ էին արվել նոր տարածքների շինարարության մեջ, սակայն այդ ներդրումների մեծ մասը կարելի է դիտարկել տնտեսագիտորեն ասած որպես «կորսված ծախս»:

Նախկինում շինարարական աշխատանքները կատարվում էին միայն նոր թաղամասերում, սակավ ուշադրություն դարձնելով հին թաղամասերի վերականգնմանը: Արդյունքում անավարտ բազմաբնակարան շենքերը և սպասարկման ենթակառույցները գտնվում են Գյումրի քաղաքի նոր թաղամասերի մեծ,

¹⁶ ՀԱԱ, ֆ. 1185, ց. 1, գ. 97, թ. 2:

¹⁷ ՀԱԱ, ֆ. 1185, ց. 1, գ. 81, թ. 2:

անկառավարելի (քաղաքաշինական առումով) տարածքներում և մինչև օրս էլ անավարտ վիճակով քայքայվում են:

Թեև տասնամյակ շարունակ այս կամ այն չափով փորձ էր արվում լուծել աղետի գոտու վերականգնման խնդիրը, այնուամենայնիվ, փաստ է, որ աշխատանքներն ակտիվացան միայն 1998թ., երբ ընդունվեց աղետի գոտու վերականգնման առաջնահերթ ծրագիր,¹⁸ որով պետական ուղղակի միջամտությամբ և ռեսուրսներով առաջնային դարձան երկրաշարժից տուժած բնակավայրերի բնակարանային և սոցիալական ոլորտի խնդիրների լուծումը, ինչպես նաև սահմանվեցին անօթևան մնացած ընտանիքների նկատմամբ բնակարանների ապահովման և սոցիալական ոլորտի օբյեկտների վերականգնման պետության ստանձնած պարտավորությունների իրականացման ուղիները:

Այսպիսով, չնայած աղետի գոտու վերականգնման իրականացվող շարունակական ծավալուն աշխատանքներին, աղետի գոտու բնակավայրերը և հատկապես Գյումրին դեռևս պահպանում են աղետյալ բնակավայրերի տեսք: Ղա պայմանավորված է բնակավայրերի հին թաղամասերում տարերայնորեն տեղակայված մեծաքանակ ժամանակավոր կացարանների, տնակների և մինչ այժմ քանդման ենթակա և վթարային տների ու շինությունների առկայությամբ:

Եվ վերջապես, երկրաշարժից հետո անցած տարիների ընթացքում Շիրակի մարզի բնակավայրերի ժողովրդագրական փոփոխությունները և վերականգնողական աշխատանքների իրականացման ընթացքը ևս մոր հարցադրումներ են առաջադրել վնասված քաղաքաշինական օբյեկտների նախկին ծավալներով կառուցման նպատակահարմարության առումով:

¹⁸ Աղետի գոտու վերականգնման առաջնահերթ ծրագիր, Երևան, 1998: